

Date – 21/06/2025
Time - 7:30 -7:40Hrs
AKASHVANI AIZAWL

HEADLINES (MORNING)

1. International Day of Yoga vawi 11-na chu tukin hian khawvel hmun dangte rualin Mizoramah hman mek a ni.
2. Prime Minister Narendra Modi-an Andhra Pradesh Visakhapatnam ah mi nuai 3 vel Yoga exercise a kaihrui a ni.
3. BJP Mizoram State President Pu Vanlalhmuakan kum 1975 a India rama National Emergency puan a ni chu India danpui palzutna leh mipuite dikna chanvo rahbeh sakna a ni a ti.
4. MPCC President Pu Lal Thanzaran sorkarin Mizoram Universal Health Care chu ngaihtuah nawn leh se an duh a ti.

<><><>

IDY

International Yoga Day of Yoga vawi 11-na chu tukin hian khawvel hmun dangte rualin Mizoramah hman mek a ni.

Mizorama a hmanna pui ber Aizawla Rajiv Gandhi Stadium-ah chuan Larsap General (Rtd) Vijay Kumar Singh an a hman pui.
Kan corr report lo ngaithla ang.

Prime Minister Narendra Modi-an Andhra Pradesh Visakhapatnam ah mi nuai 3 vel Yoga exercise a kaihrui a, Archaeological Survey of India leh Ministry of Ayush tangkawp chuan Yoga session an buatsaih a, yoga pawimawhna leh hriselna atan a athatna hrang hrang te an tarlang dawn a ni.

Andhra Pradesh sorkar hian tum khata Yoga ti tam ber Guinness World Record siam an tum a, yoga certificate nuai 50 chuang semchhuah an tum a ni.

Mizorama Yoga hmang tangkaitu hlun tak te zinga mi Govt. Siaha Higher Secondary School Principal Dr Balram Singh Pankaj-a chuan Yoga chu mihringte mamawh natna laka mihring taksa zalen tir theitu a ni a ti.

Akashvaniin a kawmnaah he thu hi sawiin Dr Balram Singh Pankaj chuan Yoga chu a hriatna rei tawh mahse tihtakzeta a chhawr chhoh tan chu kum 2006 vel atangin a nih thu a sawi a. Yoga a hmelhriat atanga vawiin thlengin nitin Yoga exercise a lak thu a sawi a. Yoga chu taksa natna laka vengtu pawimawh tak a nih thu leh cancer natna, kal tha lo, thawk nuam lo te zawng zawng veng thei tu leh taksaa thisen kal kual ti tha thei tu a nih thu a sawi a ni.

Dr Balram Singh Pankaj chuan mihring taksa chu cell tluklehdingawn nuai 3 sing sarih chuanga siam a ni a, heng cell te hian taksaah boruak tha an dawn that chuan natna tan hmun a awm lo a ni a ti a. Taksa a boruak mamawh phuhru turin Yoga exercise chuan nasa takin a pui thei a ni a ti a. Yoga chuan sakhaw hrang hrangte a thliar lo a, mi tupawhin an tih theih a nih thu leh sum leh pai ti hek bawk si lo a nih thu a sawi ni.

<><><>

BJP

BJP Mizoram State President Pu Vanlalthmuakan PMGSY hmanga Central-in kawngpui tha siamna tur sum a pek, Mizoramah an thawk tha duhlo chu ram ti hmasawn lo tu a ni, a ti.

Nimina an party office a Friday Political Session-ah thusawiin Pu Vanlalthmuaka chuan, Mizorama khaw hrang hrang an fang a, khaw kilkhawr zawkah kawngpui a chhe lutuk chu a mangan thlak hle a, hnam hnuaihnung zawkte awmna tam takte hlanchhiah a ni thin a pawl takzet a ni a ti.

Hmasawnna tak tak a thlen nan, mi retheite chawikan a pawimawh hle a, mi hausate hausak belh vak vakna hian hmasawnna thuantling a siam lova, Mizoram chhungah ngei pawh khaw kilkhawr zawka awm te leh minority-te rethei tak tak chawikan tur an tam hle a, heng te tana PM Scheme tha tak tak India Sorkarin a duan te hmanga chawikan an nih ve theih hun chu BJP Mizoram chuan a thliar mek a ni, a ti bawk.

Pu Vanlalthmuaka chuan Lunglei chungchang sawiin, MP Inthlan hunlai khan Lunglei khawpui leh a chhehvel hmasawn nan thil tam tak an puang a, tunah hian Lunglei chuan harsatna an tawk mek a a pawl takzet a ni a ti a, nachhawknah chauh ringa nun ai chuan damna kim neih theihna tur kawng an pan a pawimawh hle a ni, a ti.

Pu Hmuaka chuan Pu Modi-a kaihhruai sawrkarin Mizoram tan hmasawnna a thlen thu sawiin, Mizorama rel luh dan tur ah, Kum 1998 daih tawha Mizorama Rel lo lut tura Central sorkarin a pass tawh, Compensation avanga Rel kawng siam hleitheih loh chu Pu Modi-a kaihhruai sorkar chuan a chingfel a, tunah chuan Sairang thlengin rel kawng a rawn lut ta a ni a ti a. Assam Rifles sawn chhuah chungchangah pawh Pu Modi-a sorkar bawkin a chingfel leh bawk a. Mizoram tana thil tha ti thintu party hlat tlat a, Mizoram rawn bomb tu party Congress lam an hawi leh tlat thin chu a pawl hle a ni a ti.

<><><>

SAMVIDHAAN HATYA DIWAS

BJP Mizoram State President Pu Vanlalthmuaka chuan kum 1975 June Ni 25 atanga kum 1977 March Ni 21 chhunga India rama National Emergency puan a ni chu India danpui palzutna leh mipuite dikna chanvo rahbeh sakna a ni a ti.

Akashvani in a kawmnaah he thu hi sawiin Pu Vanlalthmuaka chuan India rama State of Emergency puan chuan India danpui palzutna, mipuite

dikna leh chanvo rahbehsakna leh India democracy banpui palina hiala sawi chanchinbumite kut phuarsaka an awm phahna a ni a ti a. India democracy history-a hun thim ber nia an lo sawi thin pawh hei hian a dik zia a ti chiang a ni a ti. Pu Vanlalhmuaka chuan Emergency laia Pi Indira Gandhi duh lotu zinga a hotu liante mana lungina dah luh nghal zel chu India ram democracy hun tawnga hun rapthlak leh thim chhah lai ber a ni a tih loh theih loh a ni a ti.

Pu Vanlalhmuaka chuan he State of Emergency, India ram constitution tihboral ni a hman, Samvidhaan Hatya Diwas avangin a hun laiin India ram ei leh bar dinhmun, trade union, hnathawktute dinhmun leh mimal zalenna leh dikna chanvo hrang hrang nasa taka tihngihin a nih thu a sawi a. Democracy ramah dictator ang maia sorkar kaihhruaina a nih thu sawiin khatiang kha a thlen tawh loh nan mipuiten an duh anga Constitution an siam hmanga India ramah rorelna a awm zel theihnan an ni Pu Narendra Modi-a kaihhruai BJP te chuan hma an lak zel dawn thu a sawi a, democracy chu par vul zel se duh thu a sawi bawk a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

CYMA

Central YMA General Secretary Prof, Malsawmliana chuan Myanmar atanga sahimna zawngin Mizoram mi 27,751 an awm mek thu a sawi.

Nimina Central YMA Hall, Aizawla Myanmar raltlan hruaitute fuihtharna hun an hmanah he thu hi sawiin CYMA GS chuan raltlante chu an awmna khua leh vengin inkaihhruaina an siam te leh Sawrkar thuchhuah te ngaipawimawh a zawm theuh turin a chah a. Raltlante zingah ruihtheih thil leh sualna danga inhnawhniawh te dim an nih dawn loh thu leh dan hmanga hrem zel an nih tur thu a sawi a. Sawrkar ruahman anga Temporary ID Card nei vek turin a chah a, India khua leh tuite chauhin an neih theih Adhaar Card, EPIC, Driving Licence leh adangte neih tum talh lo turin a chah bawk a. Raltlante chu Zohnahthlak unaute an nih angin harsatna an tawh leh puih an ngaihnaah YMA chuan a puih zel tur thu leh a thlahthlam dawn loh thu a sawi bawk a ni.

CYMA President Pu Lalmachhuana pawhin thu sawiin, Mizorama raltlan te dinhmun chungchangah infuihthar tula an hriat thu a sawi a. Boruak muanawm tak hnuaia an awm theihnan anmahni camp-ah theuh infuih thar turin a chah a, hnam bil leh chi bil boruak siam lo turin a chah bawk.

Raltlante fuih tharna hunah hian Aizawl District Bawrhsap Er. Lalhriatpuia, Sr. SP CID (SB) Pu Stephen Lalrinawma, Excise & Narcotics Asst. Commissioner Pu VL Vura Ralte te anmahni hnathawh kaihhnawih thu

pawimawh hrang hrang raltlante an hrihl a. Raltlan hruaituten thu an sawi bawk a. Infuihtharna hunah hian Aizawl leh Mizoram hmun hrang hranga Raltlan Camp-a awm hruaitute, raltlan pawl hrang hranga hruaitu leh Chin Hills- a MP leh MLA engemaw zat an tel a, an vaiin mi 60 chuang an tel a ni.

Nimin vek khan Central YMA Kumpuan Committee leh Mizoram Police ten Dan loa sumdawng an dap.

CYMA Kumpuan committee leh Mizoram Police tangkawp hian Aizawl khawchhung hmun thenkhatah, Hnamdang danlo a sumdawngte dapchhuakin he hunah hian ILP fello enfiah niin a fel lo chu thu neitu te kutah hlan an ni a. CYMA Vice President leh Kumpuan Chairman Prof. Lalnuntluanga chuan danlo a sumdawng Mizo hming hawh tir an awm thin thu leh Mizo mipuite tanrual a pawimawh thu sawiin Dan leh thupek kengkawhtute, Police te thawh pui thiama tan rual a tul tak zet thu a sawi a. A tul ang zela thuneitu te nen dan lo a sumdawngte endik chhun zawm an tum thu sawiin ram leh hnam himna atan Mizo mipuite tanrual a tul thu a sawi bawk.

<><><>